

TEZAUUR LITURGIC

7 IULIE

**ACATISTUL
SF. CUVIOASE
EVDOCHIA-
EUFROSINA
DE LA
MOSCOVA**



MOSCOVA, 2000



Акафист
святой благоверной княгине
Евдокии, в иночестве
Евфросинье

Кондак 1

Избранной от рода державного угоднице Христовой Евфросинии, яко крепкой заступнице и молитвеннице нашей, похвальная восписуем ти, чтущия тя. Ты же, яко имущая дерзновение ко Господу, Того умоли избавитися нам бед и скорбей, и в будущем веце небесное улучшить царствие, да зовем ти:

Радуйся, преподобная княгине Евфросиние.

Икос 1

Ангельское воистину безстрастие еще на земли стяжала еси, преподобная, ничтоже вменяющи княжения славу, богатств обилие, вся мира красная, о юности и красоте телесней не радивши, непрестанными же к Богу молитвами, бдением и постом плоть изнузивши

и душу добродетельми украсивши. Сицевому равноангельному житию твоему удивляющеся, сия вопием ти, преподобная:

Радуйся, от младых лет спасения взыскавшая;

радуйся в молитвах к Богу прилежавшая.

Радуйся, в напастех на Него единого упование полагававшая;

радуйся, в сани княжеством смирение сохранившая.

Радуйся, во власти державней кротость ко всем соблюдавшая;

радуйся, к нищим милосердие неоскудное показавшая.

Радуйся, в чертозе княжеством иночески пожившая;

радуйся, в неговании двора царского постническое житие явившая.

Радуйся, преподобная княгине Евфросиние.

Кондак 2

Видящи преподобная в доме отчем заповедей Божиих усердное хранение и в благочестии преспеяние, от юности навиче о спасении

душевнем паче всего ревновати и в теплых к Богу молитвах Ему воспевати: Аллилуиа.

Икос 2

Разум во благочестии утвержден имущи преподобная, не земныя радости в супружестве взыскаше, но паче всех супругу в добродетелех подражаше и того к делом добрым подвизаше, со тщанием к почести вышняго звания течаше. Сицевое житие преподобныя похваляюще, возопиим к ней таковая:

Радуйся, Бога паче всех возлюбльшая;

радуйся, в жизни славней ноши в молитвах пребывати не оставльшая.

Радуйся, во обилии благ земных постнической жизни навыкшая;

радуйся, в мирстей жизни чистоту сердца сохраншая.

Радуйся, супружеств христианских удобрение;

радуйся, жен благочестивых украшение.

Радуйся, во обилии благ живущим благочестия образ подавшая;

радуйся, во славе сущим христианского жития правило показавшая.

Радуйся, преподобная княгине Евфросиние.

Кондак 3

Сила Вышняго присно невредиму ты сохрани, преподобная, егда смертоносная язва многи окрест тебе погубляше, и многажды в нахождениих врагов безбожных соблюдаше ты от меча их и пленения. Темже, Бога благодарящи, вопияла еси: Аллилуиа.

Икос 3

Имущи сердце милостивое и к людем страждущим удобь преклонное, во всех града и княжения напастех, в запалениих огненных, в нахождениих и губительствах вражиих первее к Богу обыкла еси, преподобная, с молитвою теплою прибегати и к той вся люди подвизати. Темже, почитающе твое теплое к Богу о людех ходатайство и скорую бедствующим помощь, вопием ти сицевая:

Радуйся, гнев Божий молитвами твоими утолявшая;

радуйся, в бедах и напастех помощь Божию обретавшая.

Радуйся, крова лишенным пристанище
уготовлявшая;

радуйся, от врагов разоренным снабдение
подававшая.

Радуйся, состраданием скорби бедствующих
утолявшая;

радуйся, милосердием нищету обнищавших
отгонявшая.

Радуйся, душу ко всем милосерду имевшая;

радуйся, во мнозех благотворениях любовь к
людem показавшая.

Радуйся, преподобная княгине Евфросиние.

Кондак 4

Буря скорбных помышлений обдержаше тя,
преподобная, егда юный князь, блага ради
людей своих, волею поиде в жилище ярящихся
злонравных агарян, яко овча в ложа дивиих
зверей, и паки, егда сын твой два лета проживе
в пленении у безбожных врагов. Ты же, скорби
сердца твоего пред Господем единым в молитвах
теплых изливаючи, Ему непрестанно взывала
еси: Аллилуиа.

Икос 4

Слышавше иногда безбожнии агаряне твое, преподобная, из царствующаго града удаление, гнаша вслед тебе, в плен яти тя хотяще. Ты же, Богом сохраняема, избегла еси рук вражиих, и Бога благодарящи, многи храмы и обители иноческия воздвигла еси. Темже, ведуще твою теплую к Богу любовь, вопием ти сицевая:

Радуйся, непрестанными молитвенными хвалении Бога прославлявшая;

радуйся, в непрестанную жертву благодарения Ему храмы многи создавшая.

Радуйся, приметатися во дворех Божиих возлюбившая;

радуйся, в мирстей жизни высоту иноческаго жития познавшая.

Радуйся, во славе светлаго княжения суету мирскаго жития уразумевшая;

радуйся, мира суету уразумевшим пристанище тихое во обителях уготовавшая.

Радуйся, спасения душевнаго присно желавшая;

радуйся, спасися хотящих к жизни иноческой призывавшая.

Радуйся, преподобная княгине Евфросиние.

Кондак 5

Боготечная звезда явилася еси, преподобная, в житии твоём, егда супружеских уз отрешившись, всецело Господу себе предала еси, постом и молитвами работаючи Ему день и ночь и непрестанно вопиючи Ему: Аллилуиа.

Икос 5

Видящи, преподобная, себе по смерти мужа сиротствующу, возжелала на служение единому Богу себе предати, обаче, воспитания ради чад, до времени в чертозах княжеских жити и о делах земных попечение имети понуждаема, умысли в тайне Богу работати, зельным пощением тело юное изнуряючи, людям же в светлых ризах и красну лицем себе являючи. Той единому Богу ведомыя подвиги почитающе, возопиим к ней таковая:

Радуйся, в тайне Богу послужившая;

радуйся, сокровенно от людей Тому угодившая.

Радуйся, Давидски в полунощи на молитву
восстававшая;

радуйся, во дни бодрственно дела земная
совершавшая.

Радуйся, псаломски утро в молениих
предварявшая;

радуйся, до ночи во обычных о чадех и
людех попечениих пребывавшая.

Радуйся, яко пред Богом псаломски во
вретищи и стенании душу твою смирила еси;

радуйся, яко пред людьми евангельски во
умощении главы и в светелости лица и одеяния
себе являла еси.

Радуйся, преподобная княгине Евфросиние.

Кондак 6

Проповеднику премудрому согласующися,
глаголала еси, преподобная, в сердца твоем:
всяческая в мире суета сует. Темже тихое от
суеты убежище — обитель святую сию создала
еси, еже бы в ней мира удалившися, в мире и
безмолвии пети Богу: Аллилуиа.

Икос 6

Возсия в сердцы твоём, преподобная, светлая благодати луча, тайными молитвами и подвигами возжигаемая, еяже сияния не терпя древний враг, восхоте возмутити душу твою, наустив лукавыя люди хулы глаголати о житии твоём. Ты же клеветы слышащи, духом пребывала еси в Бозе утверждена и помыслом не смущенна. Темже вопием ти, преподобная:

Радуйся, неправедное поношение без гнева терпевшая;

радуйся, злокозненное хуление несмущенно понесшая.

Радуйся, за ревность о чистоте сердца в нечистоте жития оклеветаемая;

радуйся, за зельное тела умерщвление в житии сластопитанном укоряемая.

Радуйся, от Бога единого похвалы на суде Его желавшая;

радуйся, славы токмо на небесех искавшая.

Радуйся твердое терпение во озлоблении соблювшая;

радуйся, смирением козни вражия
расторгшая.

Радуйся, преподобная княгине Евфросиние.

Кондак 7

Хотяй Господь тайныя твоя в добродетелех
подвиги ведомы людем соделати, попусти
диаволу бурю воздвигнути на тя поношений и
оклеветаний, да известно уведевше святое твое
житие, прославят вси Бога, дивнаго в тайных
рабех Своих, присно вопиюще Ему: Аллилуиа.

Икос 7

Новую показа добродетели высоту
преподобная Евфросиния, егда, видящи чад
своих злыми о ней клеветами смущаемых,
призва я тайно и часть одежд пред ними откры,
яко видети бе мощно тело ея, от поста и зельных
подвигов изсохшее и очерненное, и плоть костем
прильпнувшу; и тако смущение от сердец их
отгнавши, никомуже поведати виденное повеле.
Таковей преподобныя добродетели дивящися,
возопиим к ней сицевая:

Радуйся, во глубине смирения подвиги твоя
от всех скрывавшая;

радуйся, в широте любве чадом твоим оныя явившая.

Радуйся, очищения ради своя души, поношение безчестия терпеливо понесшая;

радуйся, избавления ради чад своих от греха осуждения, чистоту жития своего показавшая.

Радуйся, обиды от людей Судии Богу предавшая;

радуйся, худыя помыслы чад своих во благо исправившая.

Радуйся, во уверение истины подвиги твоя им открывшая;

радуйся, во избежание славы, уста их молчанием заградившая.

Радуйся, преподобная княгине Евфросиние.

Кондак 8

Странное видение плоти твоея, яко уже умершия, зряще сынове твои и жестокое твое житие уразумевше, страхом одержими, Богу, укрепившему тя в подвизах, вопияху прилежно: Аллилуиа.

Икос 8

Весь сонм злословящих людей хотяху чада твоя наказати, егда уведаша твоего жития чистоту и уразумеша велию злобу поношающих тя; ты же, яко незлобивая, никакоже попустила еси отмстити обидящим, от Бога единого чаючи оправдания своего. Темже вопием ти, преподобная:

Радуйся, сердцем кроткая;
радуйся, духом незлобивая.

Радуйся, ко обидам терпеливая;
радуйся ко обидящим негневливая.

Радуйся, в терпении обид Христу Богу подобящаяся;

радуйся, от Бога единого своего оправдания ожидавшая.

Радуйся, поношение терпением победившая;
радуйся, ко обидящим любовь сохранившая.

Радуйся, преподобная княгине Евфросиние.

Кондак 9

Все естество Ангельское возвеселися, егда Архистратиг Небесных Сил, предстояй Престолу

Божию, послан бысть к тебе, преподобная, ко исходу душу твою уготовати, и Богу, сице благоизволившему, вопияху: Аллилуиа.

Икос 9

Витии многовещанныя не возмогут по достоянию восхвалити твое ангельское безстрастие и чистоту ока душевнаго, яко, во плоти сущи, от Архистратига Божия посещения сподобилася еси и от него извещение о исходе из сего временнаго жития прияла еси. Мы же, таковую тебе от Бога данную благодать чтуще, вопием ти, преподобная:

Радуйся, безстрастием Ангелом
соревававшая;

радуйся, Архангельскаго посещения
сподобльшаяся.

Радуйся, сиянием Ангельскаго света
осиянная;

радуйся, благоуханием святыни от Архангела
облагоуханная.

Радуйся, о изшествии из мира от Господа
предызвещенная;

радуйся, явлением Ангельским от всего
земнаго отрешенная.

Радуйся, яко Архистратиг Божий явлением своим князя воздушных мытарств от тебе далече отгна;

радуйся, яко своим благодатным посещением победу на диавола тебе дарова.

Радуйся, преподобная княгине Евфросиние.

Кондак 10

Спасти хотящи душу твою, преподобная, егда от Ангела весть о скором от жития сего исходе прияла еси, внити в созданную тобою обитель ускорила еси, да тамо в безмолвии работаючи Богу, воспеваеши Ему: Аллилуиа.

Икос 10

Стена еси твердая и ограждение неоторимое обители, тобою созданней, преподобная, еже и яви Господь, еще грядущей тебе во обитель: многи бо на пути недужныя исцелила еси и во обитель вошла еси не яко новоначальная, но яко славная чудотворица. Темже, прославляюще тя, вопием ти, преподобная:

Радуйся, явлением твоим слепцу исцеление обещавшая;

радуйся, прикосновением ризы зрение тому подавшая.

Радуйся, болящих в житии твоём нужным снабдевавшая;

радуйся, тридесяти недужным при вхождении во обитель исцеление даровавшая.

Радуйся, во обитель шедшая по смирению, яко новоначальная;

радуйся, в тую вшедшая по благодати Божией, яко чудотворица прехвальная.

Радуйся, благодать Божию с собою во обитель вводящая;

радуйся, вхождением своим украшение святолепное ей преподавшая.

Радуйся, преподобная княгине Евфросиние.

Кондак 11

Пение всеумиленное принесла еси, преподобная, благодарственная восписующи Господу, сподобльшему тя иноческое пострижение прияти, к нему же во всем житии душу твою предуготовляла еси, да мира сего отлучившись и ничимже земным смущаема, вопиеши Богу: Аллилуиа.

Икос 11

Светозарная свеща иночествующим показася житие твое во обители, преподобная: аще бо и не многи дни во иночестве пожила еси, обаче всякия иноческия добродетели образ преизящный в себе явила еси. Темже, восхваляюще тя, сицевая вопием ти, преподобная:

Радуйся, вольнаго мира оставления преизящная наставнице;

радуйся, правило усерднаго за вся люди моления.

Радуйся, совершеннаго своей воли отсечения премудрое наставление;

радуйся, душевныя и телесныя чистоты светило изрядное.

Радуйся, умерщвления плоти образе преизящный;

радуйся, мирнаго купножития наставнице.

Радуйся, умныя к Богу молитвы образе;

радуйся, святаго на земли жития зеркало.

Радуйся, преподобная княгине Евфросиние.

Кондак 12

Благодати исполнена и благих дел, яко добре течение земное совершившая, в мире преставилася еси от земных к небесным, идеже веселящися предстоиши Господу и вопиеши Ему: Аллилуиа.

Икос 12

Поюще твоя многообразная людем благодеяния, восхваляем тя вси, преподобная мати Евфросиние, независтно подающую исцеления с верою к тебе прибегающим и вопиющим ти:

Радуйся, яко на небесех ныне пред Господом предстоиши;

радуйся, яко о людех пред Богом выну предстательствуеши.

Радуйся, града твоего крепкое ограждение;

радуйся, обители твоея незыблемое утверждение.

Радуйся, о благом преспеянии иночествующих тепле молящаяся;

радуйся, о утверждении добре живущих в мире Бога просящая.

Радуйся, чтущих память твою пред Богом поминающая;

радуйся, о прославляющих тя Бога молящая.

Радуйся, преподобная княгине Евфросиние.

Кондак 13

О прехвальная угоднице Божия, преподобная княгине Евфросиние! Приими смиренное сие хваление наше и твоим теплым предстательством у Царя Славы испроси нам в немощех исцеление, в добродетелех преспеяние, от врагов видимых и невидимых избавление, от вечных муки освобождение и Царства Небеснаго наследие, да с тобою присно поем Богу: Аллилуиа.

Этот кондак читается трижды, затем читается 1-й икос: «Ангельское воистину...» и 1-й кондак: «Избранной от рода державного...».

Молитва

О преподобная княгине Евфросиние, добляя в женах подвижнице, прехвальная угоднице Христова! Приими моление о нас, недостойных, с верою и любовью к тебе припадающих, и теплым к Богу ходатайством испроси граду Москве и людям от бед и напастей сохранение,

споспешествуй, яко чадолюбивая мати, чадом, тобою собранным, понести иго Христова во благодушии и терпении и добре подвизатися ко исправлению жития своего, еже ко спасению; в мире благочестно живущим испроси у Господа в вере твердость, во благочестии преспеяние и всем, с верою прибегающим к тебе и твоея просящим помощи и заступления, подавай всегда недугов исцеление, в скорбех утешение и во всем житии благопоспешение, наипаче же умоли Господа в мире и покаянии земное житие преити нам, мытарств горьких и мук вечных избавитися и Царство Небесное твоим ходатайством получитьи, идеже ты со всеми святыми Господу предстоиши, да всегда славим Отца и Сына и Святаго Духа, ныне и в безконечныя веки веков. Аминь.



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

НОВОЕ
НЕБО